

**dalla radunonza generala dalla Surselva Romontscha (SR),
venderdis, ils 17 da zercladur 2022, allas 19.30
en casa da scola a Rueun**

Tractandas:

1. Avertura e beinvegni
2. Tscharna dils dumbravuschs
3. Protocol
4. Rapport annual 2021
5. Rendaquen 2021
6. Fixar la contribuziun annuala
7. Elecziuns (presidi, suprastonza, nominaziun d'in/a suppleant/a per la suprastonza dalla Ligia Romontscha)
10. Program da lavur 2022/23
11. Varia

La radunonza ei vegnida embellida musicalmein dil duo Jenja.

1. Avertura e beinvegni

Il president dalla SR Alberto Palaia arva la radunonza fagend in cordial beinvegni a tuts presents.

Il president ha retschert differentas perstgisas. Ellas vegnan prelegidas e pridadas per enconuschientscha.

La gliesta da tractandas ei vegnida publicada duas gadas el Fegl official dalla Surselva. Las commembras ed ils commembers han retschert las tractandas per posta. La gliesta da tractandas vegn approbada unanimamein.

2. Tscharna dils dumbravuschs

Hans Peter Bundi vegn elegius sco dumbravuschs.

3. Protocol

Il protocol dalla radunonza generala 2021 ei publicaus silla pagina d'internet dalla SR, www.surselva-romontscha.ch. Il protocol vegn approbaus unanimamein.

4. Rapport dil president, fenadur 2021 - zercladur 2022

Cunquei ch'il davos rapport dil president ei digl uost 2021, ei quei rapport pli cuorts cuorts. El cumpeglia ils temps entochen el matg dad uonn.

La SR ha astgau sustener numerus projects, differentas publicaziuns da cudischs e purtaders da tun. La gliesta completa suonda el rendaquen. Denter auter ei era l'applicaziun Dicziunari da menziunar, ch'ei gratuita, denton era projects musicals, sco il purtader da tun en differents formats da Pascal Gamboni.

Eleccziun presidi LR a Sent

Il 30 d'october ha la radunonza da delegadas e delegai elegiu Urezza Famos e Gianna Luzio sco copresidentas dalla Ligia Romontscha. Donat Nay ei vegnius reelegius sco commember dalla suprastonza e representant dalls Surselva Romontscha.

Els davos meins ha ei dau ulteriuras midadas enteifer las organisaziuns regionalas, sco p.ex. in niev presidi enteifer l'Uniun dals Grischs (UdG), in niev copresidi dalla Uniun Rumantscha Grischun Central (URGC), e questa sera in niev presidi dalla Surselva Romontscha.

Nies Tschespet,nr. 78: «L'odur dalla tiara»

Egl october ei il niev Tschespet vegnius presentaus. La vernissascha ei stada a Trun. Ulteriuras presentaziuns ha ei dau als dis da litteratura a Domat ed a caschun dad ina sera romontscha organisada dall'acziun rumantscha da Domat ella Sentupada a Domat. Ei semuossa adina puspei ch'igl ei buc sempel dad activar ed interessar dapli la giuventegna per talas occurrenz, era sch'ins integrescha savens in program musical ed offerescha in aperitiv.

Miu gidonter

Quella reediziun ei in project da Laura-Alessia Arpagaus, scolara dalla scola mercantila da Glion, accumpignada dil scolast Aluis Tambornino. Nus essan perschuidi che «Miu gidonter» seigi in product che vegni ad anflar in bien diever, p.ex. per quels che vulan emprender romontsch, denton era per quels che vulan perfecziunar lur lungatg. Engraziel fetg a Laura-Alessia per sia gronda lavur ed ad Aluis Tambornino per siu sustegn. Enteifer nossa suprastonza ha Flurina Cantieni-Gliott accumpignau il project cun gronda premura. Engraziel fetg era ad ella.

Calender Romontsch

Il Calender Romontsch exista dapi varga 160 onns. Suenter l'ediziun 2022 ei la redacziun dil CR restada vacanta. Per garantir la continuitad ha la suprastonza dalla SR decidu da surprendre la lavur da redacziun dil CR 2023, quei en collaboraziun cun Toni Vinzens, la redactura partenta Lisa Schmidt-Candinas e Martin Cabalzar. Ils dretgs dil CR e la lavur tecnica restan tier Somedia. Suenter l'ediziun dil Calender Romontsch 2023 cul tema «libertad» decida la suprastonza da suprender la redacziun per in temps pli lung, da rimnar experientschas en quei connex e dad autramein turnar il bal a Somedia. Per la SR dat ei negina resca finanziaria, denton lavur supplementara che sa denton vegnir sligiada cugl agid da coredactors externs, respectivamein cun reparter la lavur sin pliras personas.

Post specialisau per plurilinguitad

Dapi igl 1. da mars 2022 ei il post specialisau per plurilinguitad integraus el departement d'educaziun, cultura protecziun digl ambient. Sco ils biars san forsa, hai jeu surpriu quella piazza. Ei dat sfidas pli grondas e pli pintgas, la lavur ei denton fetg interessanta. Cun surprendre quella piazza ei denton era stau clar ch'jeu sai buc pli restar president dalla Surselva Romontscha, quei muort conflicts d'interess che savessen sedar ordlunder. Quei ei il motiv, daco ch'jeu stoi demissionar da president e da suppleant ella suprastonza dalla Ligia Romontscha.

Suprastonza

La suprastonza ha ussa ils suandonts commembers:

president: Alberto Palaia (demissiun)
actua e vicepresidente: Rita Bearth
cassiera: Flurina Cantieni
assessura: Nadja Huonder
assessura: Andrea Sandova (demissiun)

Ils successurs vegnan elegi oz. Cun Toni Vinzens (presidi) e Linus Livers (assessur) havein nus anflau dus candidats che portan las qualitats necessarias per las incumbensas da nossa suprastonza e da noss'uniun. Autras candidaturas ein buc vegnidas inoltradas. La suprastonza savess denton duvrar dapli commembras ni commembers, cun quei che la lavur manca buc.

Jeu hai giu grond plascher da luvrar en quella suprastonza, cun quei ch'jeu hai adina saviu quintar sigl agid da tuttas e da tuts. Nus vein en quels onns luvrau en moda nuncumplicada, denton adina cunscienzusamein ed oravontut productivamein. Sco vicepresidente e president dalla Surselva Romontscha hai jeu giu numerus contacts en ed ordeifer la romontschia ed hai astgau enconuscher biaras personas da tut las regiuns romontschas ed ella diaspora. Quei ei in scazi prezios. Jeu bandunel quella suprastonza suenter nov onns e giavischel a miu successur bien success e bia plascher.

Engraziament

Per finir resta ei a mi dad engraziar a vus tuttas e vus tuts, allas commembras dalla suprastonza, a Donat Nay, representant dalla SR ella suprastonza dalla Ligia, alla Ligia romontscha cuns sias presidentas, il secretari general e sia entira equipa pil sustegn ed als promoturs regiunals Alice Bertogg e David Flepp per lur collaboraziun. En emprema lingua sauda miu «Grond dieuspaghi» alla suprastonza actuala ed a quella vegnenta. Ad Andrea Sandova, che banduna era la suprastonza, giavischel jeu tut bien sin sia via professiunala e privata, sperond sin in seveser a caschun dallas proximas radunonzas generalas.

Glion, zercladur 2022

Alberto Palaia
president SR

Il rapport dil president vegn approbaus cun in applaus.

5. Rendaquen 2021

La cassiera Flurina Cantieni presenta ils differents sustegns finansials e silsuenter il quen. Ella explichescha detagliadamein las singulas posiziuns. Il quen siara cun entradas da CHF 104'274.00 ed expensas da CHF 65'274.59, pia cun in gudogn da CHF 38'999.41.

Duront igl onn 2021 ha la Surselva Romontscha approbau ils suandonts sustegns finansials:

- ⇒ avertura «Scala Trun»
- ⇒ Tratgas indigenas, Fatmir Spescha
- ⇒ Andrea D.Deplazes, exposiziun
- ⇒ Bergamin/Caduff cudisch d'affons
- ⇒ calender per mintga gi
- ⇒ Sibylle Mani, guid da viandar Surselva
- ⇒ Cuors Romontsch Sursilvan FRR
- ⇒ disc Thomas Cathomen
- ⇒ cudisch da detgas per affons
- ⇒ app Dicziunari
- ⇒ Linus Flepp, cudisch «ina retrospectiva»
- ⇒ disc e cudisch Pascal Gamboni
- ⇒ disc «capetels» Giganto

Cunquei ch'ils revisurs ein buca presents vegn il rapport dilis revisurs da quen, Beat Pfister e René Buchli, projectaus. El rapport proponan ils revisurs d'approbar il quen sco presentaus. Il president tschenta en votaziun il quen, il qual vegn approbaus cun 21 vuschs.

6. Fixar la contribuziun annuala

La suprastonza propona da schar las contribuziuns sco suonda:

commembradi singul:	CHF 30.-
Commembradi partenaris:	CHF 50.-
Commembradi da famiglia:	CHF 50.-
secziuns/pleivs/uniuns:	CHF 50.-
persunas giuridicas:	CHF 100.-

La radunonza accepta unanimamein la proposta dalla suprastonza.

Las contribuziuns per vischnaucas ein vegnidadas fixadas egl onn 2019 per in cuoz da 5 onns e stattan quei onn buc en votaziun.

7. Elecziuns

Suenter 9 onns ella suprastonza dalla SR e da quei 2/3 onns sco president ha Alberto decidu da demissionar sco president. Sco descret el rapport ei el entras sia nova piazza sco um specialisau per la plurilinguitad tiel cantun quasi vegnius sfurzaus tier quei pass, cunquei ch'el ei staus cunfruntaus cun in conflict d'interess. La suprastonza deplorescha fetg che Alberto vegn a bandunar la Surselva Romontscha. En rama dalla radunonza generala vegn admess in grond engraziel fetg ad Alberto. Nus engraziein ad el per sia grondiusa lavur ch'el ha fatg en favur dall'uniun ed oravontut pil romontsch.

El ei staus ina persuna che ha tunschiu il maun al Plaun e fatg la proposta d'ir ina via comunabla. Per quella finamira ha el investau nundetg bia temps.

Plinavon ha el uniu las forzas dalla Romontschia per anflar in presidi per la LR. Per ils Tschespets ha Alberto investau nundetg bia temps els davos onns – quei ei adina stau in project dil cor per el. Tier il tschespet Ragischs ha el lectorau las poesias di e notg entochen ch'il ritmus consteva tier mintga vers e tut mava en rema. Era tier il davos Tschespet ei el staus meinaproject ed ha purtau ensemen culla suprastonza in fetg bi

product sin meisa. Per exact quei Tschespet “L’odur dalla tiara” ha Alberto organisau pliras vernissaschas e possibiltaun sentupadas per la Romontschia cun differents auturs romontschs. En quei onn ei il Calender Romontsch stau il tema central dad Alberto, nua ch’el ei medemamein staus fetg engaschus.

Nus tuts vein adina schazegiau la buna collaboraziun cun Alberto, sia clara lingia, siu bien humor e sia creativitat per adina anflar bunas sligiazions.

Per sia nova piazza da lavur giavischein nus bien success, bia satisfacziun ed essan segirs ch’el seigi la dretga persuna per quei post. Era per sia veta privata giavischein nus tut bien e schein engraziel fetg!

La suprastonza ei cuntenza d’astgar proponer Toni Vinzens sco niev president. Toni Vinzens (30) stat a Rueun ed ei oriunds da Sagogn e scolast al gimnasi dalla claustra a Mustér, nua ch’el instruescha latin e talian. El ha studegiu latin, talian e grec vegl a Turitg sco era a Pisa. Toni vegn elegius unanimamein sco president dalla Surselva Romontscha – Cordiala gratulaziun per quell’elecziun! A Toni vegn engraziau per sia prontadad da s’engaschar per l’uniun ed oravontut pil romontsch.

En in proxim pass vegn cuntinuau cull’elecziun d’in niev commember da suprastonza. Andrea Sandova ha ils davos dus onns susteniu la suprastonza, uss ha ella decidu da sededicar a novs projects. Sia gronda savida davart differents lungatgs ei spert semussada sco in grond avantatg per nosa suprastonza. Per quei motiv dat ei era grazia ad ella nosa pagina d’internet per tudestg, talian, engles, franzos e secapescha per romontsch. Sco scolasta da cuors da romontsch lavura ella di per di cul romontsch ed enconuscha tgei basegns ch’ei avon maun. In grond engraziel fetg per tut il prestau. Cun in applaus apprezzescha la radunonza la lavur che Andrea ha fatg per l’uniun.

La suprastonza fa la proposta d’eleger Linus Livers sco niev suprastont. La suprastonza ei leda d’haver anflau el ed engrazia ch’el ha dau suatientscha alla damonda da daventar assessur dalla suprastonza. El vegn elegius unanimamein. La suprastonza selegrel sin ina buna collaboraziun. Linus ei sco niev suprastont automaticamein era delegau dalla Surselva Romontscha.

René Buchli, ch’ei gia revisur da quen dalla Surselva Romontscha, sco era Andrea Sandova, che banduna la suprastonza, stattan a disposiziun sco suppleants per la SR. Era els ein vegnir elegi unanimamein.

En connex culla davosa elecziun va ei per la nominaziun d’in suppleant per la suprastonza LR. Entochen dacheu ha Alberto Palaia fatg quei. La suprastonza propona ch’ il niev president dalla SR, Toni Vinzens, resti vinavon en quella posiziun. Cheutra propona la suprastonza da sustener quella nominaziun cun alzar la carta da vuschar. Toni Vinzens vegn elegius unanimamein.

In engraziel fetg a tut las personas che stattan a disposiziun per promover il romontsch enteifer las retschas dallas Surselva Romontscha.

8. Program da lavur 2022/23

Calender Romontsch

Sco gia tematisau el rapport dil president ha la Surselva Romontscha surpriu la lavur da redacziun dil Calender Romontsch per garantir la continuitad da quel. En collaboraziun cun Toni Vinzens, la redactura partenta Lisa Schmidt-Candinas e Martin Cabalzar ha la suprastonza instradau las lavurs per garantir il CR 2022. Igl ei in grond avantatg da saver reparter la lavur sin pliras personas.

Miu Gidonter

Il cudisch „Miu Gidonter“ digl onn 1977 ei exausts e la SR ha priu la decisiun da surluvrar el. Laura-Alessia Arpagaus vegn a surluvrar il cudischet en rama da sia lavur interdisciplinara. La Surselva Romontscha sustegn ella tier quella lavur.

Il cudisch dil 1977 cuntegn ell'emprema part ina gliesta da plaids romontschs tenor alfabet. La secunda part cuntegn maletgs en ner ed alv cul vocabulari corrispudent. Ils maletgs ein buca pli adattai per ina restampa.

Il cudisch niev sedrezza en emprema lingia a glied carschida che secasa en nos vitgs ni persunas ch'ei interessadas d'emprender sursilvan (per exempel en connex cul cuors da stad FRR, cuors LR ni Café rumantschs). Cunquei ch'il cudisch cuntegn in vocabulari fundamental sa el era vegnir duvraus en scola.

Il cudisch cuntegn 50 paginas tematicas cun fotografias ed in vocabulari corrispudent. Il vocabulari duei esser fundamentals e sper il sursilvan era cuntener la translaziun tudestga. In vocabulari tenor alfabet ei buca dispet necessaris.

Pil maletgs ei la sligiziun optimala stada da cumprar fotografias ni graficas da licenza. Ils cuosts persunter ein fetg mudests. Miu Gidonter sepresentar daniev en in format A4 cun ina cuviarta loma sco entochen uss.

El cudisch ein codes da QR integrai per saver trenar la pronunzia.

Duront la radunonza generala ha ei dau neginas ulteriuras propostas pil program da lavur 2022/2023.

10. Varia

Roman Pfister ei president dall'Uniun da las Rumantschas e Rumantschs en la Bassa, URB). El porta ils megliers salids dall'URB e presenta l'uniun. Cun in sguard anavos ell'historia vegn vesibel ch'ina gruppa da lavur ha inoltrau igl onn 1989 gl'emprem rapport. Il 1991 ei l'URB scuntrada a Laax, nua ch'ei ha dau discussiun davart ils statuts e la commembranza. Ozildi sa mintgin daventar commember/commembra.

L'egliada anavon muossa che novas sfidas spetgan l'uniun. La pandemia ha sias consequenzas, ei dat ina certa survegliadetgna ed igl engaschament maunca. Franc drova ei dapli presenza sin palancau naziunal. Cun ils mieds digitals eis ei pusseivel da contonscher in niev publicum. Plinavon eis ei legrevivel che l'uniun stat finanziamein bein. Ei drova novs e buns impuls sco era buna reclama entras l'URB e las uniuns che s'engaschan pil romontsch.

Lorenz Alig menziuna ch'ins hagi cun Alberto Palaia anflau ina buna persuna pil post da plurilinguitad. Igl ei stau grev d'anflar ina persuna acceptada per quell'incarica. Igl ei vegniu investau bia lavur per crear quei niev post. Quei niev post ei da gronda impurtonza per la plurilinguitad dil cantun Grischun.

Diego Deplazes porta salids dalla Ligia Romontscha e declara ch'ei seigi per las copresidentas buca stau pusseivel da saver separticipar alla radunonza generala. Ellas laschien solidar ed engrazien pigl engaschi. Diego Deplazes informescha davart iniziativas ed ediziuns actualas. Plinavon accentuescha el ch'il recept da success seigi "mo da cuminonza". Ei drovi era vinavon ina buna collaboraziun che porschi maun in a l'auter.

Suenter ina davosa canzun dallas artistas, Jenja, siara il president allas 21:00 la radunonza generala engraziend per il sustegn ed engaschi da tut ils presents ed alla vischnaunca dad Ilanz/Glion per la hospitalitad.

Suenter la radunonza offerescha la Surselva Romontsch in aperitiv.

Falera, ils 8 d'uost 2022



Rita Bearth
actudara SR